

Wulf Wagers wunderliche Weltbetrachtung

Dr Weltontgang naht!

Liebe Freund des ungestümen schwäbischen Wortes, jetzt isch 's no bald soweit: dr Weltontgang naht endgültig!

Tsunami, Weltwirtschaftskrise, a Frau als Kanzler, en Deutscher als Papscht, DSDS, Tokio Hotel, Mario Barth, Karl Moik, Klimakataschdophe – äll des wär no zom verkrafta. Aber jetzt isch au no dr weltweit gröschte Hersteller von Bierdeckel, die badische Katz Group pleite. Badener halt!

Die zu erwartende Auswirkung auf onser schwäbische Xellschaft ka ma sich kaum vorstella. Der BUND, der Bund für Umwelt und Naturschutz müsst' eigentlich auf d' Barikada ganga, weil Milliarden von Mucka en offene Biergläser versauft werdat. Bedienunga en de Gasthäuser werdat bloß no



mit Putzloppe romlaufa om des Kondenswasser aufzomwisch, des sonscht dia Bierdeckel aufganga hättat. Außerdem werdat künftig bloß no Bedienunga mit Abitur ond ma Intelligenzquotienta von 120 ei'gstellt, denn dia miassat sich alles merka, was ihre Gäscht so tronka hend ond was sonscht älls per Strichlichte auf dem Bierfilzle notiert wordat ischt. Do wird's Nacht werdat in de schwäbische Gaschthäuser.

Apropos notiert: Der CDU-Grande Friedrich Merz (was macht der heut überhaupt?) hot amol a'kündigt, dass künftig die Steuererklärung auf ma Bierdeckel platz han miasst. Was mach mr denn do jetzt in Zukunft? Uf 's Etikett suudla, en da Bierdeckel schmiera, auf das Kaschta kratza, gar koi Steuererklärung me abgeba? Scheiß egal. 's Geld vrreckt sowieso. I kenn Leut, die hend jetzt scho kois meh. No brauchat mr au koine Bierdeckel meh. Schlemme Zeita. Merkat 'r dass dr Weltontgang droht?

Bis näggschd Woch'

Ihr

Wulf Wager